

Obraćanje komandanta EUFOR-a generalmajora Martina Dorfera

13. godišna konferencija GI MO BiH

24. april 2019.

Gospodo ministrice, gospodo generali, glavni generalni inspektore, dame i gospodo,

Prošle godine, ubrzo nakon što sam preuzeo dužnost komandanta EUFOR-a, sa zadovoljstvom sam prisustvovao 12. godišnjoj konferenciji Generalnog inspektorata MO BiH. Također sa zadovoljstvom, čestitao sam brigadnom generalu Ahmiću imenovanje na novu dužnost i poželio mu puno uspjeha u radu. Od tada sam bolje upoznao generala Ahmića i njegov nepogrešivi osjećaj odgovornosti prema onima kojima služi, iznad svega pripadnicima Oružanih snaga. Ja čvrsto vjerujem da Generalni inspektorat ima značajnu ulogu jer on predstavlja institucionalni mehanizam pomoću koga se unutar ove organizacije osigurava profesionalno ponašanje, uključujući osnovne vojne vrijednosti, kao što su integritet, etika i poštivanje zakona i propisa. Jednako sam zadovoljan bio i kada sam primijetio da je glavnokomandujući generalpukovnik Senad Mašović u svojoj viziji OS BiH za period 2019-2023. naveo kao svoje ključne ciljeve i "dostizanje najviših standarda u oblasti profesionalizma i najviših etičkih standarda".

Profesionalni i etički standardi ne samo da štite status organizacije u cjelosti, nego i prava i status vojnog osoblja, što je možda još važnije. Korištenje otvorenog i lakodostupnog sistema za prijavljivanje svih eventualnih nepravilnosti u MO BiH i OS BiH je od suštinske važnosti. Jednostavno se ne može dovoljno snažno naglasiti koliko su ove mjere važne za moral i duh zajedništva u Oružanim snagama. Zbog toga bi inspektori u Generalnom inspektoratu i inspektori u komandama i jedinicama Oružanih snaga BiH trebalo da s pravom budu ponosni na dobar posao koji obavljaju i doprinos koji daju ugledu Oružanih snaga.

Isto tako, građani Bosne i Hercegovine moraju imati povjerenje u osobni integritet, lojalnost ustavu i sposobnost pripadnika Oružanih snaga Bosne i Hercegovine. Jačajući to povjerenje, Generalni inspektorat istovremeno jača i Oružane snage. Stabilne i sposobne Oružane snage imaju stabilizirajući i integrirajući uticaj na cijelo društvo i na mnogo načina Oružane snage BiH se ističu kao primjer drugima.

Iako sam ja, kao komandant EUFOR-a, prvenstveno usredotočen na naše glavne zadatke pružanja podrške održavanju sigurnog i stabilnog okruženja, isto tako sam u širem okviru sveobuhvatnog pristupa EU posvećen i pružanju podrške razvoju potpuno profesionalnih, sposobnih i samoodrživih Oružanih snaga BiH. Svjestan sam da je Generalni inspektorat preuzeo veliku odgovornost s Poglavljem 14 Instrukcija stranama i da tu odgovornost izvršava na veoma profesionalan način i uvjeravam vas da je EUFOR, zajedno sa NATO štabom u Sarajevu, uvijek spreman i voljan pomoći.

Gospodo ministrice, gospodo generali, glavni generalni inspektore, dame i gospodo, hvala vam na ovoj prilici i privilegiji da vam se obratim na ovoj konferenciji i poželim puno uspjeha.

Generalmajor Dorfer završio je svoje obraćanje osobnim napomenama.